



EM 2019/144

EM 2019/91

25/9-2019

Nivi Olsen

Uunga siunnersuut: Utoqqalinersiaqarneq pillugu Inatsisartut inatsisaata allanngortinnissaa pillugu Inatsisartut inatsisaat nr. xx, xx. xxx 2019-imeersoq. (Utoqqalinersianik ikilisitsisoqartinnagu aningaasanik innuttaasup akissarsiarisinnaasaanik qaffaaneq)

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)
(Siullermeerneqarnera)

Utoqqalinermit siusinaartumillu pensionisiat allanik isertitaqarnerit nassatarisaannik annikillineqartarunnaarnissaasa kinguneqaataannik pillugit Naalakkersuisut kingusinnerpaamik UPA2021-mi nassuiaammik saqqummiussinissaannik peqquneqarnissaat pillugu Inatsisartuni aalajangiiffisassatut siunnersuut.

(Inatsisartunut ilaasortaq Siverth K. Heilmann, Atassut)
(Siullermeerneqarnera)

Siunnersuutit marluk utoqqalinersiaqarnermut tunngasut uani ataatsimut sammeneqarput. Naalakkersuisut siunnersuutaat siulliullugu oqaaseqarfigissuara.

Siunnersuut utoqqalinersiaqartut atungaanik pitsanngorsaaqataassaaq. Siunissami utoqqalinersiallit utoqqalinersiami saniatigut annertunerusunik aningaasarsiorsinnaalissapput utoqqalinersiaminik ilannganneqaratik. Tamanna Demokraatinit tapersorsorparput.

Siunnersuutip utoqqalinersiallit sivikinnerusumilluunniit suliinnartarnissaanik malitseqarnissaa neriuutingaarput. Utoqqalinersiallit ilisimasai, piginnaasai sulisinnaassusaallu pisariaqartippagut. Ataqqivarpulli utoqqalinersiallit ilai sulisimanermik qasusimasartut, taamaalillutillu sulisinnaajunnaarsimallutik. Utoqqalinersiallit taakkua inuiaqatigiinnut annertuumik tunisereersimanerat paasitinnissaa pingaartipparput, aammalu eqqortuusooq eqqissillutik pensionistiunertik sulingikkaluarlutik qasuersaarfigisinnaagaat.

Aaqqissuusseqqinneq ukiut pingasut qaangiuppata nalilersorniarlugu Naalakkersuisut saqqummiussissutimini nalunaarput. Tamanna Demokraatinut pingaaruteqarpoq, paasisariaqaratsigumi aaqqissuunneqarneq ajunngitsumik sunniuteqassanersoq.

Tamatumuuna Atassutip sammisamut assiguttumut nassuiaatiliortoqarnissaanut siunnersuutaanut ingerlaqqissuunga. Nassuiaat kingusinnerpaamik UPA2021-imi saqqummiunneqassasoq Atassummit piupaneqarpoq. Oqareernittuut Demokraatinit nuannaarutingaarput Naalakkersuisut ukiut pingasut iluani



suliniutit nutaat nalilersussamaarmagit, isumaqarpugullu pisariaqartoq paasissallugu suliniutit nutaat ulluinnarni qanoq malunniuteqassamaarnersut. Taamaalilluni asuli sulinerussaaq 2021-imi Inatsisartunut nassuiaatiliortoqassappat. Suliniutimmi nutaat ulluinnarni malunnaqutaanersut paasiniallugu nukigut atorniartigit.

Taamatut oqaaseqarluta Naalakkersuisut siunnersuutaat 144 Peqqissutsimut Isumaginninnermullu ataatsimiititaliamut innersuupparput. Immikkoortoq 91 Atassummiit itigartipparput.